may - 16 27

DECLARATION

DV ROY, EN FAVEVR des Princes, Ducs, Pairs, Officiers de la Couronne, Seigneurs, Gentilshommes & autres qui s'estoient essoignez de sa Majesté.

3896

9

Publice en Parlement le 12. May, 1617.



A PARIS,

Par FED. MOREL, & P. METTAYER, Imprimeurs ordinaires du Roy.

M. DC XVII.

Auec Prinilege de sa Majesté,

38





OVIS par la grace de Dieu, Roy de France & de Nauarre, A tous presens & àvenir, Salut. La prompte

obeissance qu'ont renduà nos commandemens depuis la mort du Mareschal d'Ancre, les Princes, Ducs, Pairs, Officiers de nostre Couronne, Seigneurs, Gentilshommes, Officiers de nos Cours souveraines, & tous ceux qui les avoient assistez, contre lesquels nous avions decerné nos lettres patentes des mois de Ianuier & Feurier derniers, nous a faict assez cognoistre que le seul desir de

A ij

leur conservation, & d'empescher la ruine qui leur estoit procuree par les insolens, violens & pernicieux desseins dudit Mareschal d'Ancre, les auoit contraints à s'esloigner de nous, & chercher leur seureté dans les armes, bien qu'illicites, d'autant que ledit Mareschal se seruoit, contre no-Are intention, de nos forces pour les opprimer. Mais comme il a esté de nostre dignité de decerner nos lettres de Declaration à l'encôtre d'eux, lors qu'ils commettoient des actions contraires à leur deuoir, au lieu d'attendre iustice de nous: Maintenant que nous sommes asseurez de leur sidelité, & qu'ils nous ont faict recognoistre que la seule necessité de leur conservation, les avoit portez à s'affocier seulement pour s'oppoler aux violences dudit Marefchal : Et que nous auons esté suffi-

samment informez de leur part, de leurs bones intentions enuers Nous & nostre Royaume, & du desir qu'ils ont d'employer leurs vies pour en accroiftre la grandeur, & maintenir Nous & nostre authorité: Et qu'ils sont grandement desplaisans d'auoir leué des gens de guerre, arresté & prins nos deniers : imposé sur nostre peuple des contributions, & faict trauailler aux fortifications des places qu'ils tenoient, nos subjets à coruces: Ce qu'ils nous ont protesté qu'ils n'eussent iamais entrepris, & moins de faire entrer des estrangers dans nostre Royaume, s'ils n'y eussent esté contraints pour éuiter la ruine & desolation entiere d'eux & de leurs familles: Il est de nostre clemence & Royale bonté, en les traictant fauorablement, de leur pardonner les fautes qu'ils peuvent

NeU

en cela auoir commises, & de les restablir dans les charges, honneurs & dignitez qu'ils possedoient auparauant, puisque d'ailleurs cela peut seruir pour affermir en nostre Royaume la paix tant necessaire & desirce des gens de bien. C'est pourquoy apres auoir mis cet affaire en deliberation en nostre Conseil où estoient aucuns Princes de nostre lang, autres Princes, Ducs, Pairs, Officiers de nostre Couronne, & principaux de nostredit Conseil, Sçauoir faisons que de l'aduis d'iceluy, & de nostre cerraine science, pleine puissance & authorité Royale, Nous auons dit & declaré, disons & declarons par ces presentes signees de nostre main, Que nous renons lesdits Princes, Ducs, Pairs, Officiers de nostre Couronne, & tous ceux qui les ont assistez, pour nos bons &

7

loyaux subjets & seruiteurs: Voulons & entendons la memoire de tout ce qui est arriué en ces derniers mouuemens pour les faicts cy dessus specifiez, & autres concernans ladite leuee d'armes, & actes d'hostilité, demeurer du tout esteinte & abolie; comme nous l'esteignons & abolissons par cesdires presentes: à la charge que à l'aduenir ils se contiendront dans les bornes du respect qu'ils nous doiuent, & rendront l'obeissance qu'ils sont tenus à nos commandemens: Et que dés à present ils renonceront à toutes ligues & affociations qu'ils peuuent auoir faictes entr'eux & autres nos subjects ou estrangers, tant dedans que hors le Royaume, de quelque condition qu'ils puissent estre : & generalement s'acquitteront du deuoir de bons & fidels subjects & seruiteurs, à quoy leur naissance les oblige: & moyennant ce, nous les auons restablis & restablissons en tous & chacuns leurs biens, meubles & immeubles, honneurs, dignitez, charges, estats, offices & pensions, desquels nous leur donnons pleine & entiere main-leuce, leuons & ostons à ceste sin toutes saisses sur iceux. Voulons & entendons qu'ils iouyssent de nos graces, faueurs, bienfaits, honneurs & gouvernemens; & exercet leurs charges & offices, ainsi qu'ils faisoient auparauant, sans qu'ores & à l'aduenir ils y puissent estre troublez ny empeschez en quelque sorte & manière que ce soit : Imposant sur ce silence à nos Procureurs Generaux, leurs Substituts presens & à venir, & tous autres, nonobstant toutes Declarations, interdictions, & autres lettres patentes qui ont esté cy-deuant par nous

par nous decernees & publices en nos Parlemens au contraire. Lesquelles nous auons reuoquees & reuoquos, declarées & declarons nulles & de mul effect & valeur, & tout ce qui s'est faict en execution d'icelles : lesquelles pour cét effect de nostre grace speciale, nous voulons estre ostees & tirees des Registres de nos Cours de Parlemens. Tenons en outre quittes & deschargez ceux qu'ils ont commisaux maniemens de nos deniers & autres qu'ils pourroient auoir impofez & actuellement touchez, pourueu que dans six semaines apres la publication des presentes ils rapportent en nostre Chabre des Comptes double de leurs estats, arrestez & signez par l'vn desdits Princes & Ducs: & pareillement des bois qu'ils peuuent auoit coupez & enleuez de nos Forests: Voulons aussi que nos Edicts & De.

B

clarations cy-deuant faicts pour la Pacification des troubles de nostre Royaume, mesmes celuy de Blois en suitte & consequence du Traicté de Lodun, soient inuiolablement executez, gardez & obseruez de poinct en poinct selon leur forme & teneur, & que soubs l'auctorité & benefices d'iceux, tous nos subiets tat Catholiques que de la Religion pretenduë reformée, viuent desormais en bonne paix, vnion & intelligence soubs nostre obeyssance, sans qu'ils se facent les vns aux autres aucuns reproches pour raison des choses passées. SI DONNONS EN MANDEMENT à nos amez & feaux Conseillers les gens tenans nos Cours de Parlemens, Chambres de nos Comptes, Baillifs, Seneschaux, Juges ou leurs Lieutenans, & à tous nos autres Iusticiers & Officiers qu'il appartiendra chacun endroict soy, que ces presentes ils verisient, & facent lire, publier, garder & observer selon leur forme & teneur. Et asin que ce soit chose serme & stable à tousiours, Nous auons fait mettre nostre seel à cesdictes presentes. CAR tel est nostre plaisir. Donné au Bois de Vincennes au mois de May, l'an de grace, mil six cens dixsept. Et de nostre Regne le septiesme.

Signé, LOVYS.

Et sur lereply, Parle Roy,

DE LOMENIE.

Età costé est escrit, VISA.

Et seellé du grand seel de cire verte sur lacs de soye rouge & verte.

Leuës, publiées & Registrées, ouy & ce requerant le Procureur General du Roy, & ordonnos que coppies collationnées serot enuoyees aux Bailliages & Seneschaussées, pour y estre publiées & registrées à la diligence des Substituds dudit Procureur General, qui là certisieront auoir ce faict au mois, à peine d'en respondre en leur nom. A Paris en Parlement, le douziesme May, mil six cens dix-sept.

Signé,

DV TILLET.







